

«Vegnir vegl en dignitad e cun segirezza materiala»

Cusseglie federal Alain Berset ha referì a Cuira davart la Refurma dal provediment da vegliadetgna 2020

DA MARTIN CABALZAR

■ **«Vegnir vegl en dignitad e cun segirezza materiala.»** Quai saja la finmira da la Refurma dal provediment da vegliadetgna 2020 che vegn en votaziun ils 24 da settember, ha declerà cusseglie federal Alain Berset en ses referat da gievgia passada en chasa Samedia a Cuira. Gist per la populaziun muntagnarda dal Grischun cun ina gronda cumpart da seniors portia la revisiun gronds avantatgs. L'introducziun da la segirada da vigls e survivents saja stada 1948 – pia avant 70 onns – in'impurtanta acquisiziun sociala ed in ferm attest da la solidaritad svizra, ha punctuà *Alain Berset*. Entant ch'il project saja vegnì revedì en il decurs dals emprims 50 onns na betg main che 10 giadas hajan ils ultims 20 onns tschintg emprovas fatg naufragi. Gist perquai saja ina revisiun oz pli urgenta e necessaria che ensadura. La revisiun preschenta che vegnia sustegnida dal cussegl federal sco era da la gronda maioritad dal parlament federal saja in tipic cumpromiss elvetic. El procura per in equiliber finanziel tant per l'emprima sco per la segunda pitga. Cunter l'iniziativa mobilieschian cunzunt ils communists da Geneva e potents circuls economics da Turig, accentuescha Berset.

Ina necessitad urgenta

La stabilitad finanziela da la AVS saja dentant periclitada perquai che las anna-

das cun bleras naschientschas (onns 50 e 60) cuntanschan ils proxims onns la vegliadetgna da pensiun. Era la durada probabla da la vita creschia ed ils tschains sajan enormamain bass. La finmira da la nova refurma è da garantir las rentas actualas e d'adattar la prevenziun da vegliadetgna al svilup da la societad. Cun respargns ed entradas supplementaras duai la AVS vegnir tegnida en enquiliber en fin la fin dal proxim decenni, ha punctuà Berset.

Las midadas principalas

La vegliadetgna da pensiun dad um e dunna vegn egalizada successivamein sin 65 onns. La refurma pussibilitescha dentant in pensiunament flexibel tranter 62 e 70 onns. La tariffa da convesiun minimala vegn reducida pass per pass dad oz 6,8 pertschient sin sis pertschient per stabilisar la prevenziun professiunala obligatoria. Quella reducziun vegn cumpensada cun conceder als novs retscheviders da la renta in lev augment da 70 francs il mais per singuls resp. 226 francs per partenaris. L'augment pertutga dentant mo las rentas da l'avegnir, las rentas actualas na vegnan betg auzadas u sbasadas. Tgi che lavuria vinavant sur 65 onns ora possia meglierar vinavant las rentas da la AVS e da la prevenziun professiunala. Uschia duai l'activitad da gudogn en la vegliadetgna daventar pli atractiva ed a l'economia stettian a dispo-



A Cuira ha cusseglie federal Alain Berset defendì a moda zunt engaschada la Refurma dal provediment da vegliadetgna che vegn en votaziun ils 24 da settember.

FOTO M. HARTMANN

siziun forzas da lavur cun gronda experientscha, manegia Berset. L'augment prevì da la taglia da plivalur per 0,3 pertschient correspundia ad in rap per in café. Quai saja dentant in pretsch ordvart mudest a favur da la segirezza dal provediment da vegliadetgna.

I va per l'avegnir da la Svizra

Cusseglie federal Berset spera ch'il suveran sustegna cun duas giadas gea il project da refurma. I giaja facticamain per noss avegnir. En cas d'in na vegnia la Svizra en ina situaziun grevianta. Ins vegnia bain a tschertgar vias or dal dilemma,

simpel na vegnia quai dentant betg ad esser, sco las experientschas dals ultims 20 onns hajan cumprovà. Ina nova revisiun dovria temp ed il problem daventia adina pli virulent, avertischa Berset concludend. Perquai pledescha el per dus vigurus geas a la refurma ils 24 da settember.